

全上古三代秦漢
三國六朝文

晉

第五
函十冊

全晉文卷一百四

烏程嚴可均校輯

陸雲

五

祖考頌

雲之世族承黃虞之苗緒裔靈根之遺芳用能枝播千條穎振萬
葉繁衍固于三代饗祀存乎百世豈非皇慶之積祐神明之殷祥
者哉在周之衰有嬀之後將育于姜而貞龜發鳴鳳之兆周史表
觀國之繇故能光宇營丘奄有東海支庶蕃庶而肩祚昌大矣遭
世多難子孫蕩析逐于南土烈祖丞相邵侯顯考大司馬武侯明
德徽哲口雄特秀固上天所已繼跡前期惠成口顧者也是已有
吳雲興而邵侯龍見遂風騰海竭電斷荆楚運籌制勝底定經略
文德光宣武功四克乃作台衡已御于王政天罔與先代比隆義
問與前修接響固所謂汪洋浩浩不世出者哉武侯已光遠之度

襲重規之範宣朗之明照會暉之景故寅亮樞極則萬物涓曜緝熙有邦而宇內恪居及至中葉亂曰虎臣綏援既集而大難時弭德濟封域之內威揚函夏之表遂仍世作宰焜曜祖業車實襲軌襲不改帶元勳昂于光國洪烈著于隆家攷德計功比之前代未有茂于此者也是以小子敢慕徽猷欽述芳烈雖不足曰當朱弦之一唱發清廟之三歎蓋爾臣子之遺恩罔極之所處也乃作頌曰

悠悠聖緒上帝是臨世篤其猷於顯徽音神風往播福祿來尋靈根既茂萬葉垂林繁盛海隅穎靈漢陰既曰靈止芳祐允淑乃步斯瀆降神有陸赫矣二公應期載育明明邵侯允哲允謀徽心昭德淑問宣猷如日之升如川之流炎精既頽黃輝曷煥光宅海邦大造江漢王于出征二公斯難長驅致居九有有判咸黜凶醜區域寧晏天祿未終大命有集卜食東夏元龜既襲聿來耶宮作蕃

舊邑公徒斯振帝旅凱入於變時雍神道經始肅肅九命永言徽
止公拜稽首對敷天子猗歟盛歟邵侯有作我考纂戎爰究爰度
遠除尋軌崇基式廓昭明有家祖廟奕奕中葉虎臣稱亂西秦靈
旆電揮伐鼓霆震會朝哀舉征不浹辰遐風遠埽萬里無塵有族
斯祐念功在茲袞衣之宜遂作上司台光增朗方險載夷穆矣暉
章有吳之期我祖我考受言藏之曄曄藻裳再命同服駢駢四牡
二世方轂分珪比瑞天秩底祿公堂峻趾華構重屋昔在二伊于
殷有聲在漢之興亦曰韋平惟祖惟考履貞大亨邈彼披陽追蹤
阿衡駿惠雨施景潤雲行洋洋玄化功濟其民風馳海表光被嶽
濱二后重規世有哲人肅雍碩頌萬載口振

張二侯頌

案二侯張昭張承

張氏之先蓋少昊氏之苗裔也其在春秋晉德方休而張老延譽
爰暨有漢文成佐命于初基司空揚聲于末葉流長祚遠世不乏

侯輔吳將軍文侯遭季末雲擾遂避難于東有吳之興實爲謀主
桓王卽世援建太祖知命審于將萌先識鏡于未兆遂作上將輔
成王業立朝無不易之方正色有犯顏之亮固所謂謇謇王臣古
之遺直者也奮威將軍定侯明德光遠軌量弘濟文敏足已華國
威略足已振眾重規繼體而大業暉崇故休祚頻繁寵靈仍世天
秩之體彌彰而毀盈之心茲沖用能保寵固世考終頌問蓋竹帛
之所光宣詠歌之口揄揚也乃作頌曰

烈文遠祖肇自上皇金天濔曜遂濟窮桑真人有作飛龍在天畱
侯載見階雲自淵卽謀神造啟運妙玄有漢再命度邑于東其在
中葉誕育司空邈矣唐陵有恭斯庸寧行盈止世篤天祿神之聽
思俾我戡穀繁過芳祐底之洪族洪族旣昌再惠音徽於穆二侯
仍世雙飛堂堂輔吳抑抑奮威如龍之躍如鳳之輝薄言戾止在
彼紫微弭金紛若四海畔換文侯乃顧妙世達觀逝彼塗方度茲

江漢鴻飛遵海聿來有亂遭家不造戮我明聖桓后肇揚侯承末
命皇大烝哉天保永定匪侯卽度宗緒孰正帝整我旅外薄四荒
命作惟師時惟鷹揚遂登上將亮彼大皇底邑胙土命珪有璋蹇
蹇我侯明發宿夜襲彼遺直興言有暮聿懷來忠王室之故猗歟
定侯祇服清曜奕奕瓊範玉潤淑貌淵謂往藏朗思來照曾是徽
章再世被荷庸勳開國明道隆家苾苾其芬淑問揚和有蔚其文
如林之華皇矣帝祚受言旣崇女子有行作合儲宮條延紫極穎
衍皇靈亶亶定侯在盈思冲祇寵戒溢永懷慎終重光竝曜播我
芳風

榮啟期讚

榮啟期者周時人也值衰世之季末當王道頽陵遂隱居窮處遺
物求己沂懷玄妙之門求意希微之域天子不得而臣諸侯不得
而友行年九十被裘鼓琴而歌孔子過之問曰先生何樂荅曰吾

樂甚多天生萬物唯人爲貴吾得爲人矣是一樂也曰男爲貴吾
又得爲男是二樂也或皆不免于緼緼而吾行年九十是三樂也
夫貧者士之常也死固命之終也居常待終當何憂乎孔子聽其
音爲之三日悲常被裘帶索行吟于路曰吾著裘者何求帶索者
何索遂放志一丘滅景榛藪居眞思樂之林利涉忘憂之沼曰卒
其天年榮華溢世不足曰盈其心萬物兼陳不足曰易其樂絕景
雲霄之表濯志北溟之津豈非天真至素體正含和者哉友人有
圖其象者命爲之讚其辭曰

芒芒至道天啟德心自昔逸民遁志山林邈矣先生如龍之潛夷
明收察滅跡在陰傲世求己遺物自欽景遯瓊輝響和絕音戀彼
丘園研道之微思樂寒泉薄採春蕤鳴弦清泛撫節高微有聖戾
止永言傷悲天造草昧負道實嘉於鑠先生旣體斯和熊羆作祥
黃髮皤皤耽此三樂遺彼世華翼翼彼路行吟曰遊的的黻冕陋

我輕裘永脫亂世受言一丘媚茲常道聊曰忘憂

逸民箴

余昔爲逸民賦大將軍掾何道彥大府之俊才也作反逸民賦盛稱官人之美寵祿之華靡偉名位之大寶斐然其可觀也夫名者實之賓位者物之寄窮高有必顛之吝溢美有大惡之尤可不慎哉故爲逸民箴曰戒反正焉

浩浩太素判爲兩儀經始君臣朝有俊弼野有逸民各有攸屆而後品物有倫在昔后帝齊物達觀賞不假爵敎不示勸號諡莫設而生黎瀆晏降迄中古黃象可觀而唐文有煥乃彫乃藻大樸旣散樸之旣散萬百熙心形爲寵放神爲利淫有翹者車命彼在林是故懷玉喪寶而被褐解襟恬亡智生與世或競匪智無鑒匪心伊鏡芒芒禹迹鞠爲塗徑惟是每懷徧彼反正正反于寵旣尸干祿相協厥居而豐其屋祿之旣尸刑爲爾司屋之旣豐喪家于宮

故非據之災戒之在凶人皆知存之爲存而莫知得之爲喪榮猶
振穎墜若頽荒咎自專寵福在循牆是故保其安者常危而忘其
存者不亡無休爾榮身實親名無謂爾崇神期好冲戒彼覆餗冒
此棟隆慎微如顯乃保身曰終自古在昔逸民有作相彼宇宙方
之委畀夫豈無不休而好是冲漠是故名利之災至人攸恪謂予
未信無靈監予桑霍天明旣畏神道無親善在求己慶由積仁無
念爾本聿修厥淳執盈如虛乃反天真逸民司正敢告官人
吳故丞相陸公諫

惟赤烏八年二月粵乙卯吳故使持節郢州牧左都護丞相江陵
郡侯陸公薨嗚呼哀哉皇朝迭紹成命昊天聖王作矣世有哲臣
觀監在吳乃降斯神思皇我后應運對揚穎秀崇華景逸扶桑龍
輝襲極鳳鳴玉堂舉旗清阻奮鉞夷荒攸結沈維峻極公綱將撫
遠績括地九圍皇渚爽泰昊旻疾威生民如何哲人其頽登靈在

天遺音播微敢揚元勳表之素旂乃作誄曰

濬哲我祖時文峻德玄粹納真清休載式本承慶輝駿惠罔極申
錫多祜本支千億芳條遠蔭靈根茂植根條伊何苗黃裔舜長發
有祥貽我祚晉神明之緒實蕃瑰雋和音嗣世不替碩彥明鑒在
下降命上玄我公初載天嘏之純重光納照旋璇授銓仰儀喬嶽
俯濯洪川清輝秀穎雲翹映晨肇彼岐嶷允迪天真先心則智率
意斯仁秉夷清昧體靈協神神休戴鑠九德兼和挹揮茂朴豐渚
鎮華景峻凌高玄源湧波造辰竦隆彌海廓遐光備旣渟逸軌爰
超閼罔苞荒景靈渥耀山林嶽秀天光乃照窮化機神探蹟衆妙
駭塵氛埃澄響清肖恢淵博量騰嶮峻邵振綱宇表登軌絕蹈厥
初藏器栖蟠海嶽披藻崑崙濯秀暘谷沈輝熙茂清塵熠鑠含章
在淵發揮龍躍時復陽九承乾之衰有皇于井玉軒徘徊爰茲赫
奕需期雲飛天步皇輿載見太微華堂誕基委蛇自階鼎輝旣濟

嘉命乃集和美未口宰物下邑康年委登惠風時協在斷無頗于
教斯輯金虎覲精戎車孔肆神寶播越天人釋位有命在茲帝思
元帥委弁總干振翼虎噬威靈既授六軍有序乃誓我眾乃整我
旅神干山立雄旗電舉懸旌汜陽卽戎江潯我后日敬上帝臨予
靖端夙夜匪盜匪處經始縣縣滂沱惟海乃幹中軍入作內輔公
侯陟降在帝左右關羽滔天作雲西土帝曰將軍整爾熊虎赫赫
明明皇輿出祖龍舟照淵旐旐映野鋪敦江濱仍執醜虜荆南旣
集方嶮未夷天子命我撫之西垂公侯戾止威神緝熙虔劉作虐
思輯子來妖旂北靡舉爾雄旗獷狘羣蠻祈祈遺黎柔遠能和薄
言綏之方塢肅清烈文雋武舍爵明堂冊勳天府天子曰咨我圖
乃功錫爾青土建侯于東開國名墟光宅海邦分圭作寶軒輅曰
庸旣受帝祐公用如大四鐵孔阜元戎沓藹淑旂飛藻綏章丞蓋
振我輝靈四方于邁劉王負嶮寇我西鄰公侯赫怒干戈啟陳金

鉞鏡日雲旗絳天淩岡襄嶽沈維括淵元王隕難鯨鯢墜鱗戎漢
時殪方域清塵曹休東踰我疆斯越帝簡厥佐將命其傑乃俾我
公啟我警伐江漢之漣口恭授鉞揖帝整旅隱爾霆發桓桓神誅
震驚魏方我公矯矯虎視元戎截彼醜旅效此武功武功旣彰天
威薄曜靈武振華邊垂清暴振旅凱入王假有廟假廟伊何本庸
寵祚土田陪敦四牡載路出餞于郊此惟予顧禮嘉嵩高樂和湛
露改容肅至傾蓋寵步璧帶翩紛珍裘阿邠區宇惟監繁遏帝社
於穆疇咨敷奏多士將庸元輔相惟天子僉曰公侯宜有爰止繡
裳縟藻袞帶重紫邃虛上司命公登宰帝曰丞相朕嘉君德曰茲
軒冕往踐乃職宜爾散心維黃協極邦國若否四方爾式公拜稽
首欽翼明聖乃御機衡仰徽七政祇恪本顯無易惟命巍巍天邑
惟清四門公侯作弼煥炳皇文重輝熾景協風煙燭百神秩祀兆
獻思渚克諧庶尹遂成帝勳時雍旣濟王途克廣儀形我度軌物

垂象後遐施歸崇蔭惠仰茂德栖音廣問沈響洪範遠迪玄猷洞
深靈澤崇敷天嶮垂陰翰飛樂嶮淵蟠泳沈澤豐泉巨潤博雲林
遭世大過彝倫靡肅疊疊公侯思維雅俗發憤戎衣永言禮樂被
分敦化荷戈思學體仁長物御風熙國叡鑒擢微玄輝鏡璞戒危
膏梁收後白屋五品時訓民神攸鑠我有典文如曜如辰何已崇
之匪聞伊人我有烈武如震如霆何已將之保大豐年思弘景業
熙世登民克壯碩老秉鉞河津祉祚勿引早世幽神仰慕遺輝寤
辟憂殷嗚呼哀哉永惟我公克明德心紛藹芳和被之惠林公侯
沒矣孰嗣徽音名存體逝德茂形潛民之秉思好是嘔吟嗚乎哀
哉惟帝念功寵命光大光諡典謨崇榮協泰安宮載考我公于邁
輶軒啟塗先驅驚旆哀風結輿遺思馮蓋舍此休明即彼重藹攀
慕靡及永戀光愛嗚乎哀哉

晉故散騎常侍陸府君誄

案陸喜字文仲瑀第二子孫皓時
爲選曹尙書入晉爲散騎常侍

惟太康五年夏四月丙申晉故散騎常侍吳郡陸君卒嗚呼哀哉
天降純嘏誕育俊乂才口九奧德鍾三懿應運繼期顯微闡昧特
恢大猷雍化熙世昊天不弔奄忽零墜嗚呼哀哉朝隕棠榦邦喪
國輝帝欽遺烈士詠清機思經皇心痛浹民懷揮淚充邑惜慟盈
畿敢述洪迹于茲素旂其辭曰

於穆皇源時惟誕弘權輿有媯爰帝暨王徽音接響丕祚克昌乾
鑒南眷誕降我祖顯考尚書納言帝宇正命惟允銓衡攸序篤生
常侍固天所隆祚爾靈粹陶己惠風道協體稟德與性鍾叡心遠
暢淵思遐通瞻言潛覽克哲克聰耽精遐奧肆志篇章仰咨遺訓
思齊曩蹤擒光丞晦微言是綱錯綜羣藝精徹毫芒顯允閑姿旣
明且緯敦敘汜愛經德紀義契闊邦族是綜是緯博約曰禮陳錫
載施雍雍閨闈克諧由仁率禮崇化色養寧親九族和睦德被宗
姻猗猗髦俊祈祈縉紳鑽仰明範挹道希塵愷悌弘裕惠化是振

潛機密暢靡幽不甄濯以清波權以明鈴旌善拔策刊穢紫辰邦
無媿幸靈不牟員沐浴玄源風移俗純儀德鄒甸比化泗濱耀略
切輝既升未融爰莅揚邑作尹名邦密邇帝畿大東小東宣敷五
教敝化以崇徵無墜命興無廢功帝欽良政民懷穆風粵稽舊章
率由典刑考績三載絀幽陟明超踐皇闈紆組垂纓奕世納言帝
衡以平本崇曩烈堂構克榮征輦屢振干戈未戢乃秉雄戟徵戎
東邑四牡徂征威德以立爰守會稽青紱既襲帝曰欽哉疇咨羣
后改授顯服屯騎是撫雍容皇甸綜文經武時值大過士爽其德
虔惟常侍高明柔直履冰察霜淪心遠測春存三季移志于色頻
顛厄運載離咎慝靖享思順曹氏匪革投弁釋紱皓恩東嶽遁世
無悶清源是濯馥風彌馨明徽載鑠皇途既闢天罔誕張運在九
五違嶮卽康猗歟高懿避風遠臧帝降大命丘園是揚裸將天邑
舒藻舊京僉曰休哉昭德塞違乃升常伯補闕拾遺振纓紫極攄

光太微奕奕玄冕熠熠貂璫仰耀皇維俯映明堂輿振鳴鸞體佩
琮璜居德彌冲雖休匪康旣跼君宿未時鼎辰將陟太階弘載育
民皇靈靡顧大命奄臻厲凶彌留儵忽頽湮嗚呼哀哉黃河難澄
梁木易荒聖賢絕景希世齊光豈曰徒生實維天網於鑠常侍本
德昭仁俯鑑瑤響仰綴玉振其在克壯自蹇乘屯鳳翳靈條龍竄
祕泉收逋匿耀洪略陶緼雖跼嘉運託景風雲瑰光旣耀靈寶未
闡弗慮皇圖銜恨徂遷嗚呼哀哉江河慕海丘陵樂山於惟君德
齊聖廣淵羣彥景附漸化濯眞蓋已崇嚴函已裕淵西徂華源負
澤慕塵幽萌潛暘滯思賴振六言六行匪君不肅五有三無匪君
不極衡準失平匪君不直方策遐邇匪君不式君其永沒民其焉
則結思遺愛惟哀允惻嗚呼哀哉仲尼喪魯孺慕失聲國僑殞鄭
邦無竽笙實惟常侍徽懿克明思懷土心信結民情聞者巷泣赴
者風征八音輟響獻酢弗營羽櫟翳川輕駕盈庭揮袂雲藹殞淚

雨零嗚呼哀哉伊惟平生襲寵荷輝愷樂承明桑梓猶哀聿懷震
丘言告言歸明德遠燭慮凶曰音雖則榮泰存亡是卹爰築新邑
經始匪日眷懷不虞寧禠斯室王事靡盬皇畿是旋鳴和吉往曾
未浹辰震旆凶歸輝景長泯痛感皇祇哀普四民嗚呼哀哉穆穆
天子昭明有融乃命三人禮憲是崇賜曰歸賻榮曰贈終冠蓋南
徂映族輝邦日薄南陸辰次天漢龜筴協貞靈域載判明器旣庇
神道已羨縣象未登明星有爛軒車微動執紼同贊永棄高廈黃
廬是館寧彼昏昧荒此輝粲幽房長鍵脩夜靡旦翼翼輕蓋翩翩
丹旂龍章舒藻旟旒有輝轎輪轆結玄駟徘徊人誰弗思靡思匪
哀援扎心楚投翰餘悲嗚呼哀哉

晉故豫章內史夏府君誄

惟永寧元年五月二十五日晉故豫章內史夏府君卒嗚呼哀哉
乾鑿育俊崇茲大猷景靈垂祐黃精協符濯蹤浩素聞志玄流熙